


Sukarelawan UMP kongsi kepakaran di Kampung Tammalang

BERITA HARIAN VARSITI KEMBARA/GLOBAL 2 FEBRUARI 2017 V9



Melawat kanak-kanak yang baru dikhatakan.



Prof Yuserrie disambut wakil penduduk kampung.

Satun: Memasyarakatkan teknologi menjadi antara agenda dalam program khidmat masyarakat yang dijalankan 35 pelajar Universiti Malaysia Pahang (UMP), 'Global Student Outreach (GSO) @ Thailand 2017', di sini, baru-baru ini.

Program anjuran Perwakilan Mahasiswa Kolej Kediaman (PEKA) 2 dan Sekretariat Generasi Siswa Sihat (GENESIS) di Kampung Tammalang itu mendapat kerjasama Jabatan Hal Ehwal Pelajar dan Alumni, Pusat Kesihatan UMP dan Persatuan Wanita UMP (MATAHARI).

Bertemakan 'With Love We Serve', program itu memfokuskan 11 subprogram yang turut menerapkan elemen memasyarakatkan teknologi dalam beberapa aktiviti.

Timbalan Naib Canselor

(Hal Ehwal Pelajar dan Alumni), Prof Datuk Dr Yuserrie Zainuddin, berkata program mobiliti kesukarelawan itu memberi peluang kepada pelajar menjiwai semangat bantu-membantu dan berkongsi kepakaran mereka dengan kerja lapangan yang boleh memanfaatkan komuniti setempat.

Katanya, selain memasyarakatkan teknologi, program itu merealisasikan hasrat UMP dalam memperkasa agenda kesukarelawan dan universiti-komuniti.

"Pelajar mengadakan pemeriksaan kesihatan, menjalankan pemeriksaan pendawaian elektrik rumah dan memasang lampu LED yang lebih menjimatkan, bergotong-royong dalam kenduri sekampung dan program berkhatan.

"Kumpulan pelajar

ini turut meringankan beban penduduk tempatan dengan membaiki kebocoran dan mengecat semula bot nelayan ini bagi memudahkan mereka mencari rezeki," katanya.

Berkongsi budaya

Program tujuh hari itu dirasmikan Sobri Matman yang mewakili Gabenor Wilayah Satun. Yang turut hadir ialah, Pengetua Kolej Kediaman 2, Nasrul Salim Pakheri dan Penasihat program, Mohd Ferdaus Musa.

Pada program itu, Prof Yuserrie turut meluangkan masa beramah mesra bersama peserta berkhatan dan masyarakat kampung serta membantu pelajar UMP mengecat bot.

Sementara itu, pengarah program GSO @ Thailand 2017, Muhammad Alif Mahiddin dari Fakulti

Kejuruteraan Kimia dan Sumber Asli (FKKSA) berkata, pelajar berpeluang tinggal bersama masyarakat di sini dan berkongsi budaya dengan mereka.

Katanya, mereka juga turun padang membantu kanak-kanak dalam modul pendidikan dan penjagaan kesihatan, termasuk cara membasuh tangan dengan betul, penjagaan rambut, gigi dan kuku, selain itu mereka juga diajar menggunakan komputer.

"Lebih 1,000 orang dalam kalangan masyarakat setempat hadir dalam Forum Perdana disampaikan penceramah jemputan, Pencetus Ummah (PU) Muhammad Hafiz Mohd Haneefa yang banyak berkongsi kisah Nabi Muhammad SAW dan sumbangan baginda kepada Islam sejagat," katanya.



Peserta program mengabadikan kenangan di sekitar Kampung Tammalang.

info

GSO @ Thailand 2017

- Pelajar UMP turut menyampaikan sumbangan kepada Tadika Nur Al-Naim dan Masjid Kampung Tammalang Hilir Satun
- Barangan disampaikan berbentuk papan putih, meja belajar, al-Quran, naskhah Surah Yasin, telekung dan sejadah yang dikumpulkan daripada beberapa badan bukan kerajaan, antaranya Persatuan Matahari UMP dan beberapa individu lain